

# MARIA CHITO SANTEARI

## BERE JAYOTZAKO EGUNEAN.

Eiten bayako mundura jayo  
 Oi dan danari,  
 Bere jayotzan poztasunezko  
 Igarria,  
 Esker ta doez aberatsago  
 Datorrenari,  
 Berez zor jako dagokan mallan  
 Jayaldia;  
 Jayo ezker parebaga bat  
 Orain lurrean,  
 Jayo ezker emakumeetan  
 Esleidua,  
 Jayotz onegaz danok guztiok  
 Poztu gaitean,  
 Eldu dalako gura zan egun  
 Doatsua.

¿Zé mirari da lurra guztia  
 Zoratutea,  
 Alako egun-senti eder au  
 Jayotean?  
 ¿Zé mirari da Zerua pozez  
 Gañeztutea,  
 Jese-n Landara argidotar au  
 Ikustean?

Errazoiagaz alegeratu  
 Zara Zerua,  
 Egilleari, kantaurik kanta  
 Aiñ ederrak,  
 Lora danakaz agertu zaite  
 Lurra apaindua,  
 Eguzki onek merezi ditu  
 Danen cherak.

Jatsi, gaur jatsi zaite egodun  
 Goiko taldea,  
 Baratz usaintsu atsegiñetan  
 Bizi arren,  
 Jatsi, bai jatsi galantago dan  
 Kriaturea,  
 Ikusitera zelan jayo dan  
 Nazareten;  
 Noren begiak diran argiak,  
 Baña aiñ argiak,  
 Noren matrallak larrosak baño  
 Larrosauak,  
 Eguzkiaren ondoan nolán  
 Izar chikiak,  
 Noren aldean diran zurbillak  
 Aingeruak.

Īsildu bitez, īsildu, īsildu  
     Andra andiak,  
 Rakel-Rebekak, Debora-Esterrak  
     Ta Susanak,  
 Īsildu bitez, īsildu īsildu  
     Danak guztiak,  
 Sara-Abigailak, Jael-Juditak  
     Baita Anak;  
 Zerren dienak diran beerago  
     Onen aldean,  
 Zergaitik orreen ondoan au dan  
     Nagusia,  
 Palma ederraz zelan bat egiñ  
     Ezin leitean,  
 Mirtoa deitu egiten jakon  
     Landarea.  
  
 Īsillik gorde beiz Eguzkiak  
     Ule gorriak,  
 Onek daukazun urrez egiñak  
     ikustian,  
 Alperrik euki arek aiñ eder  
     Miragarriak,  
 Onek Illargi legez biurtu  
     Ez dagian;  
 Īsi izarren argitasuna  
     Egun onetan,  
 Izarren izar diran degien  
     Aur-aldean,  
 Īsi bekoki gois̄-zale onen  
     Aldamenean,  
 Larrosaturik jagiten dana  
     Sortaldean.  
  
 Īsi matralla onen ondoan  
     Lora dan danak,  
 Lirio zuri larrosa mardo  
     Ta zabalak,  
 Īsi zidarra, rubi, jazinto  
     Perla ta granak,  
 Īsi nakarrak, baita īsilldu

Gaur koralak;  
 Ao aiñ polit orren ateak  
     Idigitean,  
 Ta bular orrek bialtzen dabon  
     Arnasian,  
 Īsilldu bedi gauz onik ezer  
     Bada Pankayan  
 Bardin ederrik aurkitzen bada  
     Arabian.  
  
 Esku ta bular orreen ondoan  
     Leyar garbiak,  
 Alabastro zeñ edurrak dira  
     Aiñ motelak,  
 Bata Jaunaren echea bada  
     Dira bestiak,  
 Zeruak, berak gloria andi bat  
     Zor deutesenak;  
 Bata Jaunari bere gogoa  
     Da poztuteko,  
 Besteak dira bere grazien  
     Zabaltzallak,  
 Bata ispillu Jauna berbera  
     Begiratzeko,  
 Amodiozko flechen besteak  
     Tiratzallak.  
  
 Bere agiñak dira aiñ zuri  
     Baña aiñ zuriak,  
 Marfillik ez da bardinduteko  
     Gaur eurakaz,  
 Bere okotza biribildu dau  
     Arte guztiak,  
 Poto chiki bat erdi erdian  
     Egiñagaz;  
 Beso, sama, oin, zankoak daukaz  
     Ondo atereak,  
 Alperrik daukaz Zeruak pillar  
     Biribillak,  
 Baña ume onek lurrean daukaz  
     Askoz obeak,

Bardingarritzat ez diralako  
 Areek diñak.

Gorputz guztiko zatiak ditu  
 Utsik bagiak,  
 Dana guztia ondo egiña  
 Dau agiri,  
 Ezagun dago beren berarez  
 Au Egilleak,  
 Egiñ dabela gorputz ta ariman  
 Miragarri;  
 Bere sorrera zan legez garbi  
 Eta santua,  
 Jayotz au bere alanche bear  
 Zan gertatu,  
 Bata loi бага eta beste au  
 Onen donstua,  
 Izan zeitezan Jaunak zituzan

Aukeratu.

Ongi etorri umecho eder  
 Ain Zerutarra,  
 Zeruko leyo eta bertako  
 Eskallera,  
 Paradisuko atea eta  
 Izar goiŕtarra,  
 Zatozalako Egun ederra  
 Ekartera;  
 Ongi etorri Jese-n Landara  
 Jayo barria,  
 Zure jayotza zabaldu begi  
 Gaur Fameak,  
 Zerren larririk aurkietan zan  
 Gizon tristea,  
 Zerren katibu legez ekarren  
 Illunpeak.

FELIPE ARRESE TA BEITIA.

Ochandion, Agorrellaren 8-an 1886-garren urtean.

